

DI'IDZA' LA'IYA QUIE DIUZI TA USE'ELA'YAQUË' LAO BEN' HEBREO

Use'ela' Diuzi ži'inë' ta
quixogue'në' ra'o

1 Tazë lasa, tazë modo, use'ela'
Diuzi tiempote ben' naca
profeta ta quixogue'jë' xuzixta'oro
quie pensari quienë'. ²Pero dza
na'a, dza reyudyi quie tiempo gula,
use'elë' ži'inë' ta quixogue'në' ra'o
quie pensari quienë'. Conlë ži'inë'
bزالonë' duže yedyi layu, apca'nnë'
yugulu ta de lao na'a ži'inë'. ³Cabë'
naca Diuzi ben' že, ben' la'iya,
cabë' na' nacarë ži'inë' ben' že,
ben' la'iya. Tuzi ca naca Diuzi lënë'
ži'inë'. Lëži'inë' na' r nabë'në' lao
yugulu ta dyia guibá len yugulu ta
de lao dyilayu conlë fuerza valor
quie di'idza' quienë'. Bë' beyudyi
udubanë' dula' xquia quiero, cana'
bedyinnë' yere'në' r nabë'në' zaca'
yebë ga zu Diuzi guibá.

Nacara ži'i Diuzi ben'
r nabë'ra ca yaca ángel

⁴Quie lena' nacara ži'i Diuzi
ben' r nabë'ra ca yaca ángel. Pca'n
Diuzi lëbë' re'në' ga nacatera belao
ca yaca ángel. ⁵Porque ni tu lasa
bigudyi Diuzi tu ángel ca unë'
gudyinë' Cristo cani:

Luë' naco' ži'ina'.

Abdyin dza ulu'ena' yaca ben'
nita' lao yedyi layu luë' ži'ina'.

Lëscan' ni tu yaca ángel bigudyi
Diuzi lëbë' ca unë' quie Cristo cani:
Në'ëdi' naca' Xuzinë'.

Lëbë' naquë' ži'ina'.

⁶Pero cati use'elë' ži'inë' bidanë' lao
yedyi layu, naquë' ben' bazucazi cati
binecue' yedyi layu, cana' unë' cani:

Re'enda' yugulu yaca ángel
gapajë' lëbë' bala'ana.

⁷Quie yaca ángel una Diuzi cani:

Rse'ela' ja ángel quia' cabë'
rse'ela'be.

Rua' mandado ja ben' rue dyin
quia' cabë' rua' mandado gui'
ta ženana.

⁸Pero quie ži'inë' una Diuzi cani:

Luë', Diuzi, inabë'lo' tuzioli.

Puro ta yu'u ni'a xnezi ruelo'
inabë'lo'.

⁹Puro ta naca tali raxelo' huelo'.

Rudielo' ta binaca tali.

Quie lena' në'ëdi', Diuzi quio',
bia' tuzo' luë' ben' r nabë'ra ca
ben' tula.

¹⁰Lëscan' una Diuzi rëbinë' ži'inë'
cani:

Luë', Señor, bzalolo' udixulo'
yedyi layu dza na'te.

Dyin bëlo' len ni'a na'alo' bëlo' guibá.

¹¹ Ca naca yedyi layu len guibá, hueyudyi huedu quien, huagulan ca quie la'ari'.

Pero luè', biyeyudyi yedu quio'.

¹² Cabè' ruzapa benè' gaban quiejè', cana' uzapalo' yedyi layu len guibá dza zaza'ra.

Cabè' rutza' benè' žabajè', cana' utza'lo' yedyi layu len guibá dza zaza'ra.

Pero luè', tuzicazi ca naco' tuzioli, biyeyudyi yedu yela' neban quio'.

Cana' una Diuzi. ¹³Lëscan' ni tu lasa bigudyi Diuzi tu ángel ca unè' gudyinè' Cristo cani:

Ure' cuèta' zaquè' yebè niga, hasta idyin dza cuècha' xni'alo' yaca ben' rudie luè'.

Cana' una Diuzi. ¹⁴Na'ra naca yaca ángel bichi bezi, ben' rue ca mandado rue Diuzi. Rse'ela' Diuzi lèjè' ta gacalèjè' ben' de yela' neban quie tuzioli.

Reya'ala' hue quiero ca na Diuzi

2 Quie lena' reya'ala' hue quiero xti'idza' Diuzi ta babero cuenda biusanla'adyi'ro inaoro xneza Cristo. ²Nacan tali ca na xti'idza' Diuzi ta udixogue' yaca ángel dza na'te. Bè Diuzi castigo nu ben' bë dula' xquia bigulejè' quie xti'idzè'. Bè Diuzi lèjè' tu castigo cabè' reya'ala' gaca quiejè'. ³¿Bizi huero ta bihue Diuzi ra'o castigo chi caora cati bënë' ra'o yela' neban tuzioli, na'ra bihue quiero di'idza' quienè'? Pues tanèro udixogue' cuin Jesús cabè' rue Diuzi uselanè' benè' yeyojè'

guibá. Na'tera quie ben' bzënaga cabè' udixogue'nè', gucabè'yaquè' nacan tali, na'tera lèjè' udixogue'jè' ra'o. ⁴Lëscan' Diuzi, zè lasa bënë' yela' milagro quienè', bënë' seña, bënë' ta beban ja benè' tacuenda ineziyaquè' nacan tali di'idza' unanè'. Tazè modo bënë' use'elè' Bichi Be quienè' ta gacalènè' ra'o con ca raxe Diuzi huenè' quiero.

Guca Jesucristo benè' cabè' naca benè', ben' nao xnezè'

⁵Lëscan' bibè' Diuzi yela' rnabè' quienè' yaca ángel ta inabè'jè' lao yedyi layu cubi ta zaza'ra. Quie lèyedyi na' rnando'. ⁶Na'ra zu tu parte lèè guichi la'iya quie Diuzi ga rnan cani:

¿Cabizi naca quie yaca ben' rda lao yedyi layu, chi luè' Diuzi, reyèchi'la'adyo' leyaquè'?

¿Cabizi naca quie yaca ben' nita' lao yedyi layu, chi luè' Diuzi, raquelo' bi raca quieyaquè'?

⁷Dyin bëlo' luè' bzulo' ja benè' ledao'zi menosra ca ja ángel, pero tu chi'zi.

Pero udapo' lèjè' bala'ana.

⁸Bëlo'jè' mandado inabè'jè' lao yugulute ta de lao yedyi layu. Cana' rnan lèè guichi la'iya quie Diuzi. Na'ra cati bë Diuzi mandado inabè' ja benè' lao yugulute ta de lao yedyi layu, bipca'nnè' tzala'la ni tu ta bigalen quiejè'. Pero neziro binedyin dza ta galen quiejè' yugulu ta de lao yedyi layu. ⁹Lëscan' neziro cabè' bë Diuzi conlè Jesús. Bënë' mandado gaca Jesús ledao'zi menosra ca yaca ángel, pero tu chi'zi. Yela' nedyè'è quie Diuzi bënë' mandado guti

Jesús lao laza yugulu benè'. Na'ra nue Diuzi lèbè' ben' belaoratzegue, ben' bala'ana gula nun quie dan' bedzagalaonè' gutinè' lè'è yaga cruzo.

¹⁰Yugulu ta de bè bzalo Diuzi naque quienè'. Re'en Diuzi yeyo yugulu ben' nao xnezè' guibá ga zuè'. Quie lena' bènè' mandado bedzagalao Jesucristo cuenda ulu'en dyè'èdi naca Cristo ben' bide dula' xquia quie, huazuenè' gatinè' lè'è yaga cruzo ta uselanè' yaca benèchi'. ¹¹Porque Cristo len ben' nao xnezè', naca tuzi Xuzijè'. Nacajè' ben' la'ya nun quie dan' bèla'ya Cristo lèjè'. Quie lena' biredue' ži'i Diuzi yèbinè' ra'o: "Nacale ben' bicha'." ¹²Lena' rnèn lè'è guichi la'ya quie Diuzi cani:

Huèpa' ja ben' bicha' cabè' ben' že gula naca Diuzi.

Gula' ja himno quienè' ga redupa ja benè'.

¹³Lèscan' rnèn cani lè'è guichi la'ya:

Nè'èdi' rzudyi'ilia' Diuzi.

Lèscan' rnèn cani:

Ni zulia' ben' bicha', ben' nao xneza', ben' ben Diuzi nè'èdi'.

¹⁴Cabè' naca quie ben' nao xneza Cristo, nacajè' benè' yudzujè' ren nacajè' bè'èla' žuba', lèscan' nacaré quie Jesús. Lèbè' guquè' benè', yudzurènè' ren nacarènè' bè'èla' žuba' cuenda gatinè' lè'è yaga cruzo ta udyiagui'nè' ben' rudyiagui' benèchi', ta inaro, xan' taxi'ibi'.

¹⁵Dyin bè Cristo naca ben' nao xnezè' libre. Bira rdzebijè' gatijè'. Cati dza rdajè' lao yedyi layu, cana' bdzebijè' gatijè', guca quiejè' ca quie ben' zu lao xa'ne mala gula

tu lala dza zujè' lao yedyi layu.

¹⁶Pues bíbida Cristo lao yedyi layu ta gacalènè' yaca ángel, dechan' bidè' ta gacalènè' yaca ben' naca ži'isuba Abraham, ta inaro, ben' nao xnezè'. ¹⁷Quie lena' ben' zi guque' benè' cabè' naca benè', ben' nao xnezè', ben' bichinè'. Cana' saque' gapè' dyin gaquè' pxuzi r nabè'ra lao Diuzi. Cana' uzucazinè' di'idza' una Diuzi huenè'. Cana' saque' yeyèchi'la'adyi'nè' dyè'èdi yaca benèchi'. Cana' saque' cubanè' dula' xquia quiejè'. Cana' saque' huelèjè' Diuzi tuže. ¹⁸Nun quie bedzagalao Cristo guquè' prueba bipsannè' bènè' cabè' mandado bè Diuzi huenè'. Cana' huazaque'nè' gacalènè' dyè'èdi nu ben' nao xnezè', ben' raca prueba.

Naca Jesús ben' r nabè'ra ca Moisés

3 Na'ra, bicha', nacale ben' la'ya. Lena' rnia' le'e como dan' ulio Diuzi le'e gacale ben' quienè'. Quie lena' reya'ala' huele pensari dyè'èdi cabè' naca quie Cristo Jesús. Naquè' ben' use'ela' Diuzi. Naquè' pxuzi r nabè'ra quiero ra'o ben' nao xnezè'. Cana' naquè' quiero. Cana' naca cabè' rue quiero quienè' yuguluro, naca tuzi cabè' rue quiero quienè'. ²Bdè' Diuzi Jesús use'elè' lèbè' gaquè' pxuzi r nabè'ra quiero. Bzucazi Jesús di'idza' ca di'idza' gudyi Diuzi lèbè' huenè'. Lèscan' Moisés, bzurècazinè' di'idza' ca di'idza' gudyi Diuzi lèbè' ta gacalènè' ben' quie Diuzi unita' dza na', ta inaro, yaca ben' Israel, ben' naca familia quie Diuzi. ³Pero nacara Jesús ben' r nabè'ra ca Moisés. Ca quie nacara ben' uzulao rue familia

ben' r nabè'ra ca ži'inè', cana' nacara Jesús ben' r nabè'ra ca Moisés. ⁴Quie yugulu familia unita' ben' uzulao bè ta unita' ži'inè'. Pero Diuzi uzulaonè' bènè' yugulu ta de. ⁵Quie lena' Moisés, como ben' rue mandado quie Diuzi, bzucazinè' di'idza' ca di'idza' gudyi Diuzi lèbè' gualènè' ben' quie Diuzi unita' dza na', ta inaro, yaca ben' Israel, ben' naca familia quie Diuzi. Guca dyin quie Moisés udixogue'nè' lèjè' ca di'idza' una Diuzi cabè' ta gaca dza zaza'ra. ⁶Lèscan' bzucazi Cristo di'idza' ca di'idza' gudyi Diuzi lèbè'. Pero netza' cabè' naca quie Cristo, porque nun quie naquè' ži'i Diuzi racalènè' ra'o, ben' nao xnezè' nacaro familia quie Diuzi. Cana' naca quiero chi inaoro xnezè' du guicho du la'adyi'ro, chi biusanla'adyi'ro sudyi'ilèro lèbè', chi suro gusto cuezaro dyè'èdi hasta dza gatiro.

**Cabè' una Diuzi quie ben' quienè',
ben' yeyo ga zuè' yezila'adyi'nè'.**

⁷Quie lena' naca quiero cabè' una Bichi Be quie Diuzi dza na'. Lena' rnèn lè'è guichi la'iya quie Diuzi cani:

Na'adza, chi tali rele bi na Diuzi le'e,

⁸bigacale ben' laxta'o zidi, cabè' bè bala ben' unita' dza na' ptza'jè' Diuzi.

Bèjè' Diuzi zèdi hasta beyudyi paciencia quienè', cati dza udajè' lao lato dachi.

Lena' una Bichi Be quie Diuzi gudyinè' lèjè' cani:

⁹Lao lato na' bè xuzixta'ole nè'èdi' zèdi hasta beyudyi paciencia quia'.

Cana' bèjè' la'acazi blè'èjè' cabè' tahuen bia' quiejè' lao chopa galo iza.

¹⁰Quie lena' bdzè'èda' lèjè', gucha' jè': "La'acazi nezile ca re'enda' huele, pero bire'enle huele ca re'enda'. Bire'enle huebè'le xneza'."

¹¹Quie lena' bdzè'èda' lèjè' uchugulia' quiejè' bzètoga' laohua' unia': "Biguidajè' ga zua' yezila'adyi'jè'."

Cana' una Bichi Be quie Diuzi dza na'.

¹²Bicha', gapale cuidado bigacale ben' laxta'o yaladyi' usanla'adyi'le xneza Diuzi nun quie dan' bihue quiele quienè'. ¹³Mejorla hue'lèle laguedyile di'idza' žela'adyi' yugu dza tu nede lato. Cana' reya'ala' huele cuenda bihue dula' xquia quiele le'e gan, na' huele condre Diuzi. ¹⁴Porque chi inaoro xneza Cristo biidzebiro biusanla'adyi'ro sudyi'ilèronè' dyè'èdi, na'ra nacaro ben' quienè'. Cabè' bèro tanèro cati uzulaoro unaoro xnezè', cana' re'ennè' huero hasta dza cati gatiro. ¹⁵Lena' rnèn lè'è guichi la'iya quie Diuzi cani:

Na'adza, chi tali rele bi na Diuzi le'e, bigacale ben' laxta'o zidi cabè' bè bala ben' unita' dza na' ptza'jè' Diuzi.

Cana' rnèn lè'è guichi la'iya quie Diuzi. ¹⁶Na' inaba' le'e tu di'idza'. ¿Nuži ja ben' bzènaga xti'idza' Diuzi, na' ude beyudyi bzènagajè' xti'idzè', caora na' ptza'jè' lèbè'? Pues yaca ben' yedyi quie Moisés, ben' Israel, ben' ulioguè' nación Egipto, lèjè' bèjè' cana'. ¹⁷Lèscan' inaba' le'e: ¿Nuži ja ben' bdza' Diuzi lao chopa galo

iza? Pues yaca ben' bē dula' xquia. Quie lena' bdza' Diuzi lējē' gutijē' lao lato dachi. ¹⁸Lēscan', ĩnuži ja ben' uchugulī Diuzi quie, bzētoguē' laohuē' unē' biguidajē' ga zuē' yezila'adyi'jē'? Pues yaca ben' bibē quie quie Diuzi, lējē' uchugulinē'. ¹⁹Na'ra blē'ēro cabē' guca quiejē' biūzaque' yeyojē' ga zu Diuzi como dan' bibē quiejē' quie Diuzi.

4 Quie lena' tu raca nerega'nlē Diuzi ra'o di'idza' ta yeyoro ga zuē' yezila'adyi'ro, reya'ala' gapale cuidado ta hue quiele quie Diuzi, yela' na' yeyole ga zunē' yezila'adyi'le. ²Porque cabē' udixoguē' Diuzi yaca ben' unita' tiempote cabē' bēnē' quiejē' ta yeyojē' guibá, lēscan' udixogue'rēnē' ra'o. Pero para lējē' biben sirve bzēnagajē' xti'idza' Diuzi, porque tu bzēnagazijē'n bibējē' casa hue quiejē' xti'idza' Diuzi. ³Pero ra'o, ben' nao xneza Cristo, hueyoro ga zu Diuzi ta yezila'adyi'ro dza gatiro. Bigaca quiero cabē' una Diuzi lē'ē guichi la'iya quienē' canī:

Quie lena' bdzē'ēda' lējē',
uchugulia' quiejē' bzētoga'
laohua' unia' biguidajē' ga
zua' yezila'adyi'jē'.

Cana' una Diuzi dza na'te. Pero cala bibē Diuzi ga guidajē' yezila'adyi'jē', como dan' nugaohue Diuzi dyin quienē' bēnē' dza cati udixunē' yedyi layu. ⁴Zu ga rguixogue'n ra'o lē'ē guichi la'iya quie Diuzi cabē' bē Diuzi quie dza gadyi. Rnēn canī:

Pseyudyi Diuzi dyin quienē' lao
xopa dza.

Na'ra dza gadyi bezila'adyi'nē'.

⁵Lēscan' zu ga rnēn lē'ē guichi la'iya quie Diuzi canī:

Biguidajē' ga zua' yezila'adyi'jē'. Cana' una Diuzi dza na'. ⁶Pero neracara falta yaca ben' yeyo yezila'adyi' ga zu Diuzi. Na'ra yaca ben' unita' tiempote, ben' bzēnaga xti'idza' Diuzi ca unē' gudyinē' lējē' cabē' bēnē' quiejē' ta yeyojē' guibá, pero bibē quiejē'xti'idza' Diuzi, na' biuyojē' ga zu Diuzi ta yezila'adyi'jē'. ⁷Quie lena' bzu Diuzi itu tiempo cati reya'ala' hue quiero quie xti'idza'nē'. Lētiempo na' nacan na'adza. Cana' nacan cabē' una rey David dza na'te, dza unita' ben' unita' ja tiempote. Cabē' una Diuzi, cana' una rey David con ca rguixogue'n ra'o lē'ē guichi la'iya quie Diuzi canī:

Na'adza, chi rele bi na Diuzi le'e,
bigacale ben' laxta'o zidi.

Cana' una Diuzi dza na'. ⁸Chi tali lao na'a Josué uyo yaca ben' unita' tiempote guibá bezila'adyi'jē', na' biina Diuzi quie tiempo zaza'ra.

⁹Lena' neziro neza'ra dza yeyo yaca ben' nao xneza Jesús guibá yezila'adyi'jē'. ¹⁰Na'ra cati yeyoro ga zu Diuzi yezila'adyi'ro, bira sacazi'ro huero dyin. Gaca quiero yezila'adyi'ro cabē' bezila'adyi' Diuzi dza na' cati beyudyi bzalonē' yedyi layu. ¹¹Quie lena' reya'ala' inaoro xneza Cristo du guicho du la'adyi'ro ta yeyoro ga zuē' yezila'adyi'ro. Reya'ala' gaparo cuidado nu nu hue cabē' bē ja ben' unita' tiempote, bibē quieyaquē' xti'idza' Diuzi.

¹²Cabē' naca Diuzi ben' zu neban tuzioli, cabē' na' nacarē xti'idzē'. Cabē' naca Diuzi ben' de yela' huaca quie, cabē' na' nacarē xti'idzē'. Tzu'ura xti'idzē' guicho

laxta'oro zitu'ra ca tu espada neduchi'n rupalaona. Tzu'uteran ra'o zitu' ga yu'u bichi be quiero. Tzu'uteran ra'o zitu' ga zelaozi ga yu'u pensari quiero. Rulu'en ca naca pensari yu'u lu'u guicho laxta'oro, chi pensari huen, chi pensari mala. ¹³Ni tu ta bë Diuzi bisaque' ucachi'laona lao Diuzi. Rlë'ë Diuzi yugulu ca ruero. Bisaque' igachi' ca naca quiero laohuè'. Lao lëbè' yezacalao yugulu cabè' babëro, chi bëro tahuen, chi bëro tamala.

Naca Jesús pxuzi r nabè'ra quiero

¹⁴Jesús, ži'li Diuzi, naquè' pxuzi r nabè'ra quiero, bazyoguè' guibá ga zu Diuzi. Quie lena' reya'ala' huero seguir biyehuèdiro inaoro xneza Cristo. ¹⁵Na'ra Cristo racanè' reyèchi'la'adyi'nè' ra'o como dan' lëbè' cuinnè' guquè' prueba dza na', chi huenè' tamala, chi bihuenè' tamala, cabè' raca quiero racaro prueba, pero lëbè' bibènè' tamala. ¹⁶Quie lena' reya'ala' hue quiero xti'idza' Diuzi du guicho du la'adyi'ro, biidzebiro hue'lëro lëbè' di'idza' nun quie zunè' dispuesto gacalënè' ra'o, re'nè' xlatonè' guibá ga r nabè'teranè' ra'o. Chi huero cana', yeyèchi'la'adyi'nè' ra'o gacalënè' ra'o hora cati raca zëdi quiero.

5 Rbio yaca benè' nu ben' gaca pxuzi r nabè'ra quiejè' de entre laguedyijè' ta tzesènè' lao Diuzi lao lazajè'. Lëscan' nacan dyin quienè' gutinè' yaca bia naca gun quie Diuzi udyianè'ba' lao ru'aba cuenda yezi'že Diuzi dula' xquia quiejè'. ²Na'ra como benè'zi

naca pxuzi r nabè'ra, derè dula' xquia quienè'. Quie lena' nezinè' yeyèchi'la'adyi'nè' ben' binenezi, ben' birue quie xti'idza' Diuzi. ³Lëscan' nun quie derè dula' xquia quienè', tanëro ruen zi gutinè' tu bia udyianè'ba' lao ru'aba cuenda yezi'že Diuzi dula' xquia quienè' cuinnè', na'tera huazaquè' udyianè' ituba' lao ru'aba cuenda yezi'že Diuzi dula' xquia quie ja ben' yedyi quienè'.

⁴Nitu nitu bisaque'nè' huenè' cuinnè' pxuzi r nabè'ra. Dechan' Diuzi cuioguè' nu ben' huenè' bala'ana, huenè' pxuzi r nabè'ra. Cabè' bë Diuzi tiempote ulioguè' Aarón pxuzi r nabè'ra, cana' cuio Diuzi nu ben' gaca pxuzi r nabè'ra. ⁵Lëscana'rè guca quie Cristo. Quele ulionè' cuinnè' pxuzi r nabè'ra, dechan' Diuzi udapè' lëbè' bala'ana, ulionè' lëbè' naquè' pxuzi r nabè'ra con ca una Diuzi caniga:

Luè' naco' ži'ina', abdyin dza inezi ja benèchi' ži'ina' luè'.

⁶Lëscan' zurè itu parte lë'ë guichi la'iya quie Diuzi ga una Diuzi rëbinè' lëbè':

Luè' naco' pxuzi tuzioli, ca pxuzi guca Melquisedec tiempote, cana' naco' pxuzi.

⁷Cana' una Diuzi. Na'ra dza uda Cristo lao yedyi layu, caora na' unè' zidzo blidzanè' Diuzi uredyinè' unabanè' Diuzi ta gacalënè' lëbè', como dan' naca Diuzi ben' napa poder ta ucuasa ucuionè' lëbè', biguti ja benè' lëbè'. Na' como zu Cristo dispuesto ta huenè' ca re'en Diuzi huenè', benè' lëbè' cati blidzanè' lëbè' gacalënè' lëbè'.

⁸La'acazi naca Cristo ži'i Diuzi, ben

zi bedzagalaonè' cuenda ulu'en quienè' huazuenè' hue quienè' xti'idza' Diuzi la'acazi raca zèdi gula quienè'. ⁹Cati bablu'en quienè' huazuenè', na'ra guquè' ben' run yela' neban tuzioli quie ja ben' nao xnezè'. ¹⁰Bdè' Diuzi lèbè' pxuzi rnabè'ra quiero. Ca pxuzi guca Melquisedec tiempote, cana' naquè' pxuzi.

**Nacan žudyi usanla'adyi'ro
bira inaoro xneza Cristo**

¹¹Di'idza' zèra de ta inando' le'e cabè' naca quie Cristo, pero zèdi nacan ta uxi'idze'ndo' le'e, porque canezi rioñe'ele. ¹²Como baziote tiempo banezcazole cabè' una Diuzi, lena' reya'ala' uxi'idze'le yaca ben' tula cabè' unanè'. Pero neruen zi quiele yexi'idze'ndo' le'e tatula ta nacan yalo quie xti'idza' Diuzi. Abeyaca quiele ca quie xcuidi'. Puro ta nacan yalo quie xti'idza' Diuzi re'enle uxi'idze' benè' le'e. Binegacale uxi'idze' benè' le'e ta naca zèdi quie xti'idza' Diuzi. ¹³Yaca ben' binegaca tzioñe'le ta naca zèdi quie xti'idza' Diuzi, nacajè' ca quie xcuidi' nera'adyi'. Binetzu'ulaojè' hue quieyaquè' dyè'èdi quie xti'idza' Diuzi. ¹⁴Pero ta naca zèdi quie xti'idza' Diuzi, nacan para ben' huaca, ben' bayulao rue quie xti'idza' Diuzi, como dan' banezinè' rnaonè' tahuen, birnaonè' tamala.

6 Quie lena' huero seguir usèdiro ta tzioñe'ero mazara cabè' reya'ala' tzioñe'ero ta hue quiero xti'idza' Diuzi mazara. Bira usèdiro puro ta baoyoñe'ero dza na' cati uzulaoro unaoro xneza

Cristo. Banezile cabè' rguixogue' xti'idza' Diuzi, rguixogue'n cabè' reya'ala' utza'ro pensari quiero bira huero xquia, rguixogue'n cabè' reya'ala' hue quiero xti'idza' Diuzi, ²rguixogue'n quie bautismo, rguixogue'n cabè' huero uquichiro na'aro lao guicho ben' nao xneza Cristo, ben' gapa dyin cati dza sulaonè' gapanè' dyin. Lèscan' rguixogue'n cabè' naca quie ben' huati huebanjè', rguixogue'n quie dza gaca juicio. ³Pues huero seguir usèdiro tzioñe'ero mazara como cana' re'en Diuzi huero.

⁴Cana' reya'ala' huero, porque chi babeyue Diuzi ra'o ben' cubi, chi baozulaoro si'ro ca ta run Diuzi ra'o, chi bayu'uro Bichi Be quienè', ⁵chi baozulaoro usèdiro tzioñe'ero cabè' na di'idza' quienè', chi baozulaoro usèdiro tzioñe'ero quie yela' huaca gata' quiero dza cati taro lao dyila yu cubi ta zaza'ra, ⁶chi chu'unro tzala'la ca una Diuzi, chi bira inaoro xnezè', na'ra bisaque' yeyue Diuzi ra'o ben' cubi tatula yetza'ro pensari quiero tatula. Chi huero cana', naca quiero ca quie ben' uda' ži'i Diuzi lè'è yaga cruzo tatula, utitoronè' zaquè'lao lao ja benè'. ⁷Chi huero cana', naca quiero ca quie layu ri'on nisa cati ruen nisayo. Chi hue'n usecho huen quie ben' raza ra'n laona, na'ra layu dya'a na', huela'iyia Diuzi len. ⁸Pero chi hue'n puro guixi', nacan layu mala bibi zaca'n. Ruen žudyi udze'de' Diuzi len, hueyudyi huedu quien tzeina.

Naca seguro quiero lao Diuzi

⁹La' acazi inando' le'e cana', le'e bicha', ben' nedyè'èda', quie le'e

nužela'adyi'ndo' huela'iya Diuzi le'e, rnaole neza ta yeyole guibá. ¹⁰Naca Diuzi ben' rue puro ta yu'u ni'a xnezi. Bigala'adyi'nè' cabè' bële dza na' blu'ele cabè' nedyè'ële gucalële ja ben' bichiro, ben' nao xneza Cristo. Lëscan' nezi Diuzi neruele na'a cabè' bële dza na'. ¹¹Na'ra nëto' re'enndo' huele seguir yugulule inaole xneza Cristo du guicho du la'adyi'le hasta dza cati gatile nužela'adyi'le gun Diuzi le'e ca ta rbezale gunnè' le'e. ¹²Bire'enndo' yehuédile, re'enndo' huele seguir huele cabè' rue yaca los demás ben' nao xneza Cristo. Nun quie rue quiejè' ca na Diuzi, redaohuejè' rbezajè' dyè'èdi dza hue' Diuzi lëjè' cabè' di'idza' bega'nlnè' lëjè'. ¹³Na'ra quie dza cati bega'nle Diuzi Abraham di'idza', bgunte Diuzi cuinnè' huenè' ca unè' huenè', como dan' ganura ben' tula zu nacara ben' rnabè'ra ca lëbè' ta uguntènè' laohue. ¹⁴Na'ra unè' rëbinè' Abraham: “Talicazi inia' luè', huela'iya' luè' taže, hueže ži'isubo.” Cana' una Diuzi gudyinè' lëbè'. ¹⁵Pues dyè'èdi uleza Abraham dza hue Diuzi cabè' unanè' huenè' quienè'. Na'ra cati bdyin dza, bëcazi Diuzi cabè' unanè' huenè' quienè'. ¹⁶Cati rugunte ja benè', ruguntejè' lao Diuzi. Cati raca dila binaca lëbi ca rnajè' lao ben' rnabè', na'ra ruguntejè' lao Diuzi nacan tali ca rnajè'. ¹⁷Lëscan' Diuzi, bgu'untènè' dza na' laohuè' cuinnè' unè' nacan tali ca unanè'. Gu'unnè' blu'enè' dyè'èdi zuè' dispuesto uzunè' di'idza' ca di'idza' unè', bibetza'nè' ca unè' huenè'. Quie ben' bega'nle Diuzi di'idza', lëben' na' ablu'e Diuzi

seguro na' huenè' ca unè' huenè'. ¹⁸Naca chopa ta rue Diuzi bisaque' itza'n. Bisaque' itza'n ca unè' huenè'. Lëscan' bisaque' itza'n ca bgu'untènè' laohuè' cuinnè' huenè'. Bisi' Diuzi yè'. Dan' cana' rue Diuzi, lena' uxela'adyi'n ra'o taže. Cana' raca quiero, ben' rnaba lao Diuzi, ta huia ina'nè' ra'o. Cana' raca quiero, ben' rzudyi'ilè Diuzi, nužela'adyi'ro hue Diuzi quiero cabè' unè' huenè' quiero. ¹⁹Naca seguro quiero lao Diuzi cabè' naca seguro quie nu barco nerio len tu guíba naca zi'i gula, bisaque' udyiga be len tzala'la. Cana' naca quiero huazaque' yeyu'utero hasta ga zu Diuzi guibá. ²⁰Lëgan' na' naca ga uyu'u Jesús, psalonè' neza quiero cuenda saque' yeyu'urèro ga beyu'unè' guibá. Cana' naca quie Jesús, naquè' pxuzi rnabè'ra quiero tuzioli cabè' pxuzi guca Melquisedec dza na'.

Naca Jesús pxuzi ca pxuzi guca Melquisedec

7 Lëben' lao Melquisedec guquè' rey quie ciudad Salem. Lëscan' guquè' pxuzi, ben' rue mandado quie Diuzi quiero, ben' zu sibi. Na' cati bedyin Abraham, uyoguè' lao dila, bènè' gan lao yaca rey. Caora na' bro Melquisedec ptilè' lëbè' bëla'iyane' lëbè'. ²Na' bè' Abraham Melquisedec tu cue'na quie lao chi cue' yugulu ta bènè' gan uyoguè' lao dila. Na'ra cabè' laohuè', laohuè' Melquisedec, ta inaro xti'idza'ro: “Ben' naca rey, ben' rue ta yu'u ni'a xnezi.” Lëscan' como guquè' rey quie ciudad Salem, ta inaro xti'idza'ro: “Yela' ruela'iya quie Diuzi”, quie lena' rnèrè laohuè'

xti'idza'ro: "Ben' naca rey, ben' rue yela' ruela'iya quie Diuzi."
³L'è guichi la'iya quie Diuzi birguixogue'n ra'o quie xuzi žna'nè', ni quie xuzixta'onè'. Birguixogue'n quie dza golonè', ni quie dza gutinè'. Naquè' ca que ži'i Diuzi, naquè' pxuzi tuzioli.

⁴Na'ra ulehuecara pensari ca tu ben' belao naca Melquisedec. Pues hasta cuin xuzixta'oro Abraham bè'nè' lèbè' tu cue'na quie lao chi cue' yugulu ta bènè' gan uyoguè' lao dila. ⁵Na'ra cabè' na lè'è guichi ley pca'n Diuzi lao na'a Moisés dza na'te, rguixogue'n quie yaca pxuzi, ben' naca familia quie xuzixta'oro Leví. Ruen mandado ta uquižujè' yaca ben' Israel tu cue'na quie lao chi cue' quie ta de quiejè', ba'ala'cazi ben' yedyi quiejè', ba'ala'cazi ben' naca ži'isuba Abraham cabè' lèjè'.

⁶Pero Melquisedec, ba'ala'cazi binaquè' familia quie xuzixta'oro Leví, bè' Abraham lèbè' tu cue'na quie lao chi cue' ta de quienè'. Na' bèla'iya Melquisedec Abraham, ben' bega'nlè Diuzi di'idza' ta yežè ži'isubanè'. ⁷Na'ra tabalacazi na' nacara belao ben' ruela'iya quele ca ben' raca la'iya. ⁸Pues ca naca quie yaca pxuzi, ben' napa dyin uquižujè' tu cue'na quie lao chi cue' ta de quie ben' Israel, cati beyudyi dza quiejè' gutijè'. Pero ca naca quie Melquisedec, rnèn quienè' lè'è guichi la'iya quie Diuzi ca quie ben' nezu bineyudyi dza quie. ⁹Lèscan' quie Leví, ben' pquizu tu cue' quie lao chi cue'na ta de quie ben' Israel dza na', ba'ala'cazi binesuè' lao yedyi layu

caora uzu Melquisedec, huazaque' inaro bè'rènè' Melquisedec tu cue' quie lao chi cue'na ta de quienè' caora bedila xuzixta'onè' Abraham Melquisedec tu neza, na' bè'nè' lèbè' tu cue' quie lao chi cue'na ta de quienè'. ¹⁰Cana' huazaque' inaro como dan' caora na' cati bedila Abraham Melquisedec tu neza, nenu'a Abraham Leví lu'u cuerpo quienè', nenaca Leví forma quie bini lu'u cuerpo quie Abraham, ta inaro nenaca Leví ben' zagalora, ben' gaca ži'isuba Abraham dza zaza'ra.

¹¹Lao na'a yaca pxuzi, ben' naca familia quie Leví, uži' yaca ben' Israel ley quie Diuzi. Lèyaca pxuzi na' nacajè' ži'isuba xuzixta'oro Aarón. Na'ra chi tali huaca hue yaca pxuzi na' ta bigata' dula' xquia quie ja ben' nao ley pca'n Diuzi lao na'a Moisés, na'ra birnaban guida ben' tula, ben' gaca pxuzi cabè' pxuzi gaca Melquisedec. ¹²Cati yetza' quie pxuzi, lèscan'rè decazide yetza'n quie ley pca'n Diuzi lao na'a Moisés. ¹³Na'ra quie Señor quiero, rnèn lè'è guichi la'iya quie Diuzi naquè' pxuzi ca guca Melquisedec pxuzi. Pero binaca Señor quiero familia quie xuzixta'oro Leví. Naquè' familia quie ni tu ben' biguca pxuzi. ¹⁴Dyè'èdi neziro naca Señor quiero familia quie xuzixta'oro Judá. Na' biuna Moisés gaca pxuzi ben' naca familia quie Judá.

¹⁵Lena' reya'ala' tziõe'ero dyè'èdi cati ineziro babida tu pxuzi cubi, ben' naca pxuzi cabè' pxuzi guca Melquisedec. ¹⁶Binaca Jesús pxuzi nun quie ley quie Moisés

ga rguixogue'n nu familia quie ben' Israel reya'ala' gaca pxuzi, dechan' naca Jesús pxuzi nun quie biyeyudyi yedu yela' huaca quienè', tuzioli sunè'. ¹⁷Porque cani una Diuzi rëbinè' Jesús:

Luè' naco' pxuzi tuzioli, ca guca Melquisedec pxuzi, cana' naco' pxuzi.

Cana' una Diuzi dza na'. ¹⁸Quie lena' beyula mandamiento udixu Diuzi dza na' como dan' bira ben dyin. ¹⁹Pues binapa ley pca'n Diuzi lao na'a Moisés fuerza valor ta gaohue quiero cuenda saque' huelè Diuzi ra'o tuže. Pero lao laza ley na', dera ta nacara dya'a quiero. Pues nacara dya'a quiero chi sudyi'ilëro Cristo ta gaohue quiero cuenda saque' huelè Diuzi ra'o tuže.

²⁰Bgunte Diuzi cuinnè' dza cati bdè'nè' Cristo gaquè' pxuzi. ²¹Cati bdè' Diuzi ben' gaca pxuzi dza na'te, bibguntenè' cuinnè' ta gaca ben' bdè'nè' pxuzi. Pero cati bdè' Cristo gaquè' pxuzi, bguntenè' cuinnè' unè' quie Cristo cabè' rnèn lè'è guichi la'iya cani:

Bgunte Diuzi cuinnè',
bibetza'nè', huenè' ca unè'
huenè', unè':

“Luè' naco' pxuzi tuzioli, ca guca Melquisedec pxuzi, cana' naco' pxuzi.”

Cana' una Diuzi. ²²Nun quie bgunte Diuzi cana', quie lena' naca cuenda quie Cristo ta uzunè' di'idza' huenè' cabè' di'idza' bega'ntza'olè Diuzi ra'o tacubi. Lèdi'idza' na' nacaran huen ca di'idza' bega'ntza'olènè' ben' unita' tiempote. ²³Ben' zè gucajè' pxuzi quie ben' Israel tiempote, pero cati bdyin dza

quiejè' gutijè', bega'n ben' tula lao lazajè'. ²⁴Pero como bigati Jesús, tuzioli naquè' pxuzi, ganura yega'n gaca pxuzi lao lazanè'. ²⁵Quie lena' huazaque' uselanè' ra'o yeyoro guibá tuzioli. Nacaro ben' nuelè Diuzi tuže nun quie rue quiero quie Cristo. Lena' nacan tali, como dan' tuzioli neban Cristo tu ulidzè' Diuzi tanun quiero.

²⁶Cani naca quie Jesús: Naquè' pxuzi rnabè'ra quiero, naquè' ben' la'iya, bide ni tu dula' xquia quienè'. Netza' quienè', binaca quienè' ca naca quie ben' rue dula' xquia. Zuè' guibá ga naquè' ben' bala'anatzegue. ²⁷Binaca quie Cristo cabè' naca quie yaca los demás pxuzi rnabè'ra. Yugu dza rnaban gutijè' yaca bia guixi' udyiajè'ba' lao ru'aba nacaba' gun quie Diuzi. Tanëro rnaban gutijè' tuba' udyiajè'ba' lao ru'aba ta yeži dula' xquia quiejè' cuinjè'. Na'tera gutijè' ituba' udyiajè'ba' lao ru'aba ta yeži dula' xquia quie ja ben' Israel. Pero netza' cabè' bē Cristo. Tu lasazi gutinè' guquè' cuinnè' gun quie Diuzi ta yeži dula' xquia quie yaca benèchi'. ²⁸Con ca naca ley pca'n Diuzi lao na'a Moisés, bdè' Diuzi ben' gaca pxuzi rnabè'ra. Pero como nacajè' benè'zi, decazi dula' xquia quiejè'. Pero netza' cabè' bē Diuzi cati bdè'nè' ži'inè' gaquè' pxuzi. Beyudyi pca'nnè' ley quienè' lao na'a Moisés, na'ra bguntenè' cuinnè' bdè'nè' ži'inè' gaquè' pxuzi rnabè'ra. Naca ži'inè' pxuzi rnabè'ra, ben' lila'adyi' tuzioli.

Naca Jesús ben' zèlè ra'o lao Diuzi

8 Pero ta nacaran belao inando' le'e, nacan caniga: Zu tu pxuzi

rnabè'ra quiero. Lèbè' re'nè' zaquè' yebè ga re' Diuzi guibá. ²Ga ruenè' dyin quie pxuzi lu'u idao' zu guibá nacan dugalo ta bē Diuzi, quele ta bē ja benè'. ³Na' bdè' Diuzi ja ben' gaca pxuzi rnabè'ra cuenda gutijè' yaca bia guixi' udyiajè'ba' lao ru'aba gacaba' gun quie Diuzi. Na' quie Jesucristo guquè' cuinnè' gun quie Diuzi. Guca quienè' ca quie ben' bdyia cuine lao ru'aba gaca gun quie Diuzi dza cati gutinè' lè'è yaga cruzo. ⁴Chi lèbè' nezuè' lao yedyi layu, bihuenè' dyin cabè' dyin rue pxuzi como dan' zu ben' naca pxuzi, ben' rudyia gun quie Diuzi lao ru'aba como ca rnèn lè'è guichi ley pca'n Diuzi lao na'a Moisés. ⁵Pero cabè' ruejè', ruejè' dyin quie pxuzi, cabè' na' naca quiejè' ca quie tu copia ta ulu'ezin quie idao' ta zu guibá. Neziro naca quiejè' ca quie copia como dan' cati ilè'èti'zi rdziogue sulao Moisés huenè' idao' de la'ari', caora na' una Diuzi gudyinè' lèbè': "Una' dyè'èdi, bē idao' de la'ari' con ca blu'ena' luè' dza na' cati ptila' luè' lao ya'a." Cana'una Diuzi gudyinè' Moisés. ⁶Pero Cristo, ben' naca pxuzi rnabè'ra quiero, nacaran belao dyin quie pxuzi ruenè', como dan' naquè' ben' zèlè ra'o, ben' rute di'idza' quiero lao Diuzi con ca bega'ntza'olè Diuzi ra'o tacubi ta nacaran huenra.

⁷Cana' naca quiero como dan' chi tali birdziogue gaohue cabè' bega'ntza'olè Diuzi ben' unita' tiempote, na'ra biben zi dza na' yega'ntza'olè Diuzi ra'o tacubi.

⁸Pero blè'è Diuzi bibè quieyaquè' di'idza' bega'ntza'olè Diuzi lèjè'.

Quie lena' rnèn quiejè' lè'è guichi la'iya quie Diuzi caniga:

Cani una Diuzi:

Huadyin dza yega'ntza'olia' yaca ben' Israel len ben' laguedyijè' ben' Judá tacubi.

⁹Huetza' cabè' di'idza'

bega'ntza'olia' xuzixta'ojè' dza na' cati gucalia' ulioga' xuzixta'ojè' nación Egipto ga użacazi'yaquè'.

Bibè quie xuzixta'ojè' di'idza' ca di'idza' bega'ntza'olia' lèjè'.

Quie lena' apsanla'adya' lèjè'.

¹⁰Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojè':

Udzi'ajè' pensari quia' lu'u guicho laxta'ojè'.

Na'ra nè'èdi' gaca' Diuzi quiejè', na' lèjè' gacajè' ben' quia'.

¹¹Bira inaban uxi'idzeljè' quie quiejè' ca naca quia'.

Ni laguedyijè', ni bichijè', bira inaban uxi'idzeljè' lèjè' cuenda huebèjè' nè'èdi', como dan' yugulujè' huebèjè' nè'èdi' desde ben' gula hasta xcuidi'.

¹²Huezi'zia' dula' xquia quiejè', bira yeza'la'adya' quie dula' xquia quiejè'.

Cana' una Diuzi. ¹³Na' cati una Diuzi yega'ntza'olènè' ra'o tacubi, cana' unè' como dan' bira hue dyin cabè' bega'ntza'olènè' ben' unita' tiempote. Na'ra tu ta bira huen dyin banacan tagula, baruen bago yeyudyi yedu quien.

Ni rnèn quie tu idao' zu lao yedyi layu, len itun zu guibá

9 Na'ra cabè' naca di'idza' bega'ntza'olè Diuzi xuzixta'oro

dza na', unënan cabè' re'en Diuzi hue ja pxuzi lu'u tu idao' de la'ari' ta zu lao yedyi layu ga uyonla'adyil'jè' lèbè'. ²Lèidao' na' nacan caniga. Tanëro zu tu cuarto laonan Lato Naca La'iyá. Lèlu'unan na' zu tu candelero. Na' zèrè tu mesa ga dyia yèta xtila naca la'iyá. ³Ga beyudyi tu cuarto zu tanëro, na' zè itu la'ari'. Na' xcu'udzu la'ari' na' zu itu cuarto laona Lato Naca La'iyatzegue. ⁴Na'ra lèlu'u cuarto na' zu tu mesa dao' ga ruzejì' yalo. Lèscan' zu tu caja ga yu'u di'idza'ca di'idza' bega'ntza'olè Diuzi xuzixta'oro. Lècaja na' dužete lè'ën zu ta naca belaozi oro. Na' lu'u caja na' zu tu yeso' de oro ga yu'u yèta xtila laona maná. Lèzi lu'u caja na' yu'u xaga quie Aarón ta bebe'zi'ine. Lèzi lu'u caja na' yu'u tu yo ta'a gan' bzu Diuzi chi mandamiento quienè'. ⁵Na'ra lao caja zu chopa figura quie ángel laojè' querubines. Gatzó lao' ga zè ángel, na' raca titi' cabè' raca titi' ga zu Diuzi. Na'ra rzè ángel xilajè' lao caja na' ga bzio pxuzi r nabè'ra ren quie bia naca gun quie Diuzi cuenda yezi'ze Diuzi dula' xquia quie ben' Israel. Pero dena'zi, bihue'ro di'idza' zè cabè' ta guca lu'u idao' de la'ari' dza na'.

⁶Pues cana' bèjè' quie lu'u idao' de la'ari'. Yugu dza uyu'u ben' naca pxuzi lu'u cuarto nëro quie idao' de la'ari' ta huenè' dyin ca naca dyin quie pxuzi de quienè' huenè'. ⁷Na'ra cuarto urupe lu'u idao' de la'ari', na' ru'u tuzi ben' naca pxuzi r nabè'ra tu lasazi tu iza. Bè' tzu'unè' lu'u cuarto urupe, na' ruen zi quienè' hua'anè' ren quie bia guixi' naca gun quie Diuzi ta bzio guè'n lao caja

ga yu'u tu yo ta'a gan' bzu Diuzi chi mandamiento quienè' cuenda yezi'ze Diuzi dula' xquia quienè' cuinnè'. Na'tera bziorènè' ren tatula quie itu bia guixi' ta yezi'ze Diuzi dula' xquia quie ben' yedyi quienè'. ⁸Na' como cana' bèjè', lena' nacan ta bzioñe'e Bichi Be quie Diuzi ra'o de que tu raca nezu idao' de la'ari' naca chopa cuarto, bisaque' tzu'u ja benè' lu'u cuarto naca la'iyatzegue, ta inaro bisaque' tzu'uro ga zu Diuzi. ⁹Yugu cabè' ta bèjè' lu'u idao' de la'ari' nacan tu ejemplo ta uzioñe'en ra'o cabè' naca quiero na'a. La'acazi bètijè' bia guixi' nacaba' gun quie Diuzi, la'acazi bziojè' ren quieba' lao ru'aba, biužaque' yecubin pensari quiejè' ta tzu'ujè' pensari ca pensari re'en Diuzi tzu'u ben' rionla'adyi' lèbè'. ¹⁰Cabè' naca quie yaca bia guixi' naca gun quie Diuzi bèti ja pxuzi, lena' rguixogue'n quie ta gaoro len ta yo'oro. Rguixogue'n quie ta huero yèri cuinro lao Diuzi conlè nisa. Yugu len rguixogue'n quie bè'èla' žuba' quiero cabè' r nabè'n ra'o hasta dza cati yetza' Diuzi len.

¹¹Pero na'a babida Cristo. Naquè' pxuzi r nabè'ra quiero. Bènè' quiero guca tahuen quiero con cabè' baraca quiero na'a. Ca naca lu'u idao' ga zu Cristo guibá ruenè' dyin quie pxuzi, nacaran huenra, nacaran dugalo idao'. Binaca idao' bè benè', ta inaro binaca idao' zu lao yedyi layu. ¹²Na'ra cati uyu'u Cristo lu'u cuarto urupe ga naca la'iyatzegue, cala bi'anè' ren quie chibo ni ren quie bèdyihuagadao', dechan' ren quienè' cuinnè' bi'anè'. Cana' bènè' quiero yuguluro,

uyu'unè' tu lasazi lu'u cuarto urupe ga naca la'iyatzegue, bènè' gan gata' yela' neban quiero tuzioli.

¹³Na'ra tali na' de fuerza valor quie ren quie bèdyihuaga len ren quie chibo ta uzio ja pxuzi len ta yeyuen yèri lao Diuzi yaca ben' uditulè ta naca žudyi. Lèscan' de fuerza valor quie de quie tu bèdyihuagadao', bia bzejjè' lao ru'aba ta uziojè'n lao benè' ta yeyuen lèjè' yèri lao Diuzi. Pero quie bè'èla' žuba'zi quiejè' huazuen huen lèjè' yèri lao Diuzi. Biužaque'n yeyuen yèri pensari quiejè' lao Diuzi. ¹⁴Pero dera mazara fuerza valor quie ren quie Cristo. Du racalè Bichi Be quie Diuzi lèbè', psedyinnè' cuinnè' guquè' tu gun quie Diuzi ca naca bia guixi' guti ja pxuzi gun quie Diuzi. Pero naca Cristo gun quie Diuzi ta dya'atzegue, ta bidyia ni tu nidyi'. De fuerza valor quie ren quienè' yeyuen yèri pensari quiero lao Diuzi ta bira inao dula' xquia quiero ra'o, na' tzionla'adyi'ro lèbè', ben' neban tuzioli.

¹⁵Quie lena' naca Cristo ben' zèlè ra'o, ben' rute di'idza' quiero lao Diuzi con cabè' naca di'idza' bega'ntza'olè Diuzi ra'o tacubi. Nun quie guti Cristo lè'è yaga cruzo, de lato ta yezi'že Diuzi dula' xquia quie ja ben' unita' dza na', ben' xuzixta'oro, ben' bega'ntza'olè Diuzi tanèro. Lèscan' nun quie guti Cristo lè'è yaga cruzo, de lato ta hue' Diuzi lèjè' yela' neban tuzioli, ta inaro ben' bdènè' gaca ben' quienè'. Hue' Diuzi lèjè' yela' neban tuzioli con cabè' bega'n'lènè' lèjè' di'idza' dza na'. ¹⁶Caora de tu acta de cancelación, solamente cati

gatira ben' ulisa acta, na'tera hue dyin acta na'. ¹⁷Tu neneban ben' ulisa acta, bisaque' quisi ben' tula ta de quienè'. Pero cati agutinè', na'ra huazaque' quisijè' ta de quienè' según cabè' nan lè'è guichi. ¹⁸Pues lente di'idza' bega'ntza'olè Diuzi xuzixta'oro tanèro, ben zi ulatojè' ren ta ulu'en rue di'idza' na' lèjè' mandado. ¹⁹Dza na' udixogue' Moisés lao ja ben' Israel cabè' naca yugu mandamiento pca'n Diuzi lao na'anè'. Na'tera ude beyudyi na', uzi'nè' tu ži'ila' žna len tu taca' yaga laona hisopo, na' psebisane' len lu'u nisa nequixi ren quie bèdyihuagadao' len ren quie chibo. Na'ra bzionè'n lao guichi ley quie Diuzi. Lèscan' bzionè'n lao ja ben' Israel. ²⁰Caora na' una Moisés gudyinè' lèjè': "Lèren niga nacan ta ulu'en ra'o de que di'idza' na' ruen ra'o mandado. Nacan di'idza' bega'ntza'olè Diuzi ra'o." ²¹Lèscan' bziore' Moisés ren lu'u idao' de la'ari' lente ta de lu'una. ²²Según cabè' na lè'è guichi ley quie Diuzi, casi yugu ta de quiejè', bisaque' gacan yèri lao Diuzi chi bibzio pxuzi ren laona. Pues ta yezi'že Diuzi dula' xquia quiejè', ruen zi ilato ren.

Naca Cristo gun quie Diuzi gutinè' udubanè' dula' xquia quie ja benè'

²³Ben zi dza na' guti ja pxuzi yaca bia guixi' udyiajè'ba' lao ru'aba ca gun quie Diuzi cuenda yeyuen yèri idao' de la'ari' len ta de lu'una. Lena' nacan ca quie copia quie ta de guibá ga zu Diuzi. Pero tacuenda saque' yeyo benè' guibá ga zu Diuzi, ruen zi gati tu ta zaca' mazara ca

yaca bia guixi'. ²⁴Biuyu'u Cristo lu'u idao' de la'ari' ta bē ja benē' ta nacan copia quie tu idao' dugalo zu guibá, dechan' uyu'unē' ga zu cuin Diuzi guibá. Na' beyu'unē' zuē' naquē' ben' zēlē ra'o, ben' rute di'idza' quiero lao Diuzi cuenda gacalēnē' ra'o. ²⁵Na' dza na' uyu'u pxuzi r nabē'ra quie ben' Israel lu'u cuarto naca la'iyatzegue tu lasazi lao tu iza ta bzionē' ren binaca ren quienē' lao caja ga yu'u ley quie Diuzi. Pero bibē Cristo cana'. Tu lasazi para tuzioli guquē' gun quie Diuzi gutinē' lē'ē yaga cruzo. ²⁶Chan' bē Cristo cabē' bē pxuzi na', na'ra ruen zi gati Cristo tazē lasa desde dza cati udixu Diuzi yedyi layu. Pero binacan cana'. Cani nacan na'adza dza ruen bago iyudyi yedu quie yedyi layu: Babida Cristo lao yedyi layu guquē' gun quie Diuzi gutinē' lē'ē yaga cruzo tu lasazi para tuzioli ta udubanē' dula' xquia quie yugulu benēchi'. ²⁷Porque cabē' una Diuzi huenē' quie ja benē', unē' tanēro idyin dza gatijē', pero tu lasazi, na'tera ichuguli Diuzi quiejē'. ²⁸Lēscan' quie Cristo, tanēro guquē' gun quie Diuzi gutinē' lē'ē yaga cruzo, pero tu lasazi gutinē', na' udubanē' dula' xquia quie ben' zē gula. Na'tera yeguidē' tatula, pero cala ta cubanē' dula' xquia quie ja benē', den' ta uselanē' nu ben' rbeza ja lēbē' yeguidē'.

10 Porque naca ley pca'n Diuzi lao na'a Moisés tiempote ca quie tu ta ulu'en ra'o cabē' una Diuzi bi huenē' ta huenē' dya'a quiero dza zaza'ra. Binaca ley na' mero tadya'a re'en Diuzi huenē'

quiero. Derla tadya'a re'en Diuzi huenē' quiero. Bide fuerza valor quie ley na' ta yeyuen benē' yēri lao Diuzi, ba'ala'cazi bētijē' bia guixi', bia naca gun quienē', bziojē' ren quieba' lao ru'aba lao tu iza huio. ²Chi tali huaca yeyuejē' cuinjē' yēri lao Diuzi nun quie dan' bētijē' tu bia guixi', bia naca gun quie Diuzi, bira inaban gutijē' bia tula. Pues chi tali abeduba dula' xquia quiejē' tuzioli, bira idēbijē' chi napajē' dula' xquia. ³Pero cati bētijē' bia guixi', bia naca gun quie Diuzi, bziojē' ren quieba' lao ru'aba lao tu iza huio, lena' nacan ta yeza'la'adyijē' napajē' dula' xquia. ⁴Cana' nacan como dan' bisaque' yeduba dula' xquia quie benē' conlē ren quie bēdyihuaga, o conlē ren quie chibo.

⁵Quie lena' cati bida Cristo lao yedyi layu unē' gudyinē' Diuzi: Bisulo' gusto caora cati guti ja benē' bia guixi', bia naca gun quio', udyiajē'ba' lao ru'aba, chi bihue quiejē' cabē' nao'. Pero babzalolo' benlo' tu cuerpo quia' ta ta' lao yedyi layu hue quia' cabē' nao'.

⁶Biraxelo' ca ruejē' gutijē' bia guixi' naca gun quio', udyiajē'ba' lao ru'aba uzejijē'ba' cuenda yeduba dula' xquia quiejē', chi bihue quieyaquē' cabē' nao'.

⁷Quie lena' agudya' luē' dza na': "Ni zua', zua' dispuesto hue quia' cabē' re'enlo' luē', Diuzi. Cabē' rguixogue'n quia' nē'ēdi' lē'ē guichi la'iya quio', cana' hua', hue quia' di'idza' quio!'."

Cana' una Cristo dza na'. ⁸Tanēro rguixogue'n quie Diuzi de que

biraxenë' hue' ja benë' tu gun quienë', nica raxenë' gutijë' bia guixi' gaca gun quienë', nica raxenë' udyiajë' bia guixi' lao ru'aba uzejjë'ba' cuenda yeduba dula' xquia quiejë', chi bihue quieyaquë' xti'idzë'. Biraxe Diuzi huejë' cana', ba'ala'cazi cana' r nabë'n lë'ë guichi ley quie Diuzi ta huejë'. ⁹Quie lena' rnën rnan cani: "Ni zua', zua' dispuesto hue quia' cabë' re'leno' luë', Diuzi." Cana' udixogue'në' ra'o bira zaca'n cabë' bë ja ben' unita' tiempote bëtijë' bdyiajë' bia guixi' lao ru'aba. Lao laza lena' udixu Diuzi ta naca tacubi cati guti Cristo lë'ë yaga cruzo, guquë' gun quie Diuzi, bë quienë' xti'idza' Diuzi. ¹⁰Banuela'ia Diuzi ra'o nun quie bzu Jesucristo di'idza' ca mandado una Diuzi huenë' caora cati psedyinnë' cuinnë', guquë' gun quie Diuzi, gutië' lë'ë yaga cruzo tu lasazi para tuzioli.

¹¹Yugu dza rzë yaca pxuzi quie ben' Israel ruejë' cabë' dyin napajë' quie idao'. Yugu dza rutijë' bia guixi' rudyiajë'ba' lao ru'aba ruzejjë'ba', la'acazi conlë lëba' biyeduba dula' xquia quie ben' Israel. ¹²Pero Jesucristo guquë' gun quie Diuzi gutinë' lë'ë yaga cruzo ta yeduba dula' xquia quie ja benë' tu lasazi para tuzioli. Na'tera yere'në' zaquë' yebë ga re' Diuzi guibá. ¹³Na' zuë' rbezanë' dza cati hue Diuzi castigo yugulu ben' rudie lëbë'. ¹⁴Porque dan' guquë' gun quie Diuzi, gutinë' lë'ë yaga cruzo, cana' beyuenë' yëri para tuzioli ja ben' bdë' Diuzi gaca ben' quienë'. ¹⁵Pues nuxela'adyi' Bichi Be quie Diuzi ra'o de que nacan tali con cabë' unanë',

con cabë' rnan lë'ë guichi la'ia ya cani:

¹⁶Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojë'.

Udzi'a pensari quia' lu'u guicho laxta'ojë'.

¹⁷Bizeza'la' adya' ca naca dula' xquia quiejë', nica ca naca tamala babëjë'.

Cana' una Bichi Be quie Diuzi dza na'. ¹⁸Pues cani nacan: Cati abezi'ze Diuzi dula' xquia quiero, bira ruen zi guti ja pxuzi ja bia guixi' ta naca gun quie Diuzi ta yezi'ženë' dula' xquia quiero tatula.

Reya'ala' tzionla'adyi'ro Diuzi du guicho du la'adyi'ro

¹⁹Quie lena', bicha', huazaque' yeyoro ga naca la'iyatzegue ga zu Diuzi biidzebiro, porque guti Jesucristo lë'ë yaga cruzo ulato ren quienë'. ²⁰Huero seguir inaoro neza cubi quiero, porque chi inaoron, cana' gata' yela' neban quiero tuzioli. Cabë' uyo pxuzi xcu'udzu la'ari' ga naca la'iyatzegue dza na', cana' huazaque' yeyoro ga zu Diuzi nun quie psalo Cristo neza cubi quiero cati gutinë' lë'ë yaga cruzo. ²¹Naca Jesús pxuzi r nabë'ra quiero. Naquë' ben' r nabë'ra lao yugulu ja ben' nao xnezë'. ²²Quie lena' reya'ala' tzionla'adyi'ro Diuzi du guicho du la'adyi'ro sudyi'ilëroguë' yugo dza. Lëbë' beyuenë' yëri guicho laxta'oro. Cana' neziro dyë'ëdi baoži'ženë' quie dula' xquia quiero, gabira dula' xquia quiero de. Nacaro yëri lao Diuzi ca quie ben' bagozo yao len nisa yëri gula.

²³Huero seguir biusanla'adyi'ro hue quiero quie Diuzi, rbezaro dyè'èdi dza cati hue Diuzi quiero cabè' unè' huenè' quiero, como dan' uzucazi Diuzi di'idza' cabè' di'idza' bega'nlènè' ra'o. ²⁴Reya'ala' hue'lèro laguedyiro, ben' nao xneza Cristo, di'idza' žela'adyi' ta gacalèrojè' ta idyè'èjè' benè' huejè' puro ta yu'u ni'a xnezi. ²⁵Bireya'ala' usantro yeduparo tzionla'adyi'ro Diuzi cabè' naca costumbre quie bala ja benè', bapsanjè' bira guidajè' dza cati yeduparo. Reya'ala' hue'lèrojè' di'idza' žela'adyi' ta biyeyatijè' como dan' baruen bago idyin dza cati yeguida Cristo lao yedyi layu tatula.

²⁶Porque cati baneziro con cabè' rna di'idza' li quie Diuzi, pero chi huero seguir huero tamala, na' bisaque' inaro bineziro tamala. Chi huero cana', huero seguir huero tamala, na'tera bira bide bi hue Diuzi ta yezi'ženè' dula' xquia quiero. ²⁷Tuz ta huenè', huenè' castigo huala gula nu ben' rue cana', tzejè' lao gui' ta ra'ala' batzani' gula ga cuiagui' ben' rue condre Diuzi. ²⁸Na'ra dza tiempote cati uzu nu ben' uru'un tzala'la di'idza' ley pca'n Diuzi lao na'a Moisés, chi uzu nu chopo o nu tzona ben' guca testigo, ben' nezi tali bè ben' na' tamala, caora na' uchuguli yaca ben' r nabè' quienè' ta gutijè' lèbè', bibeyèchi'la'adyi'jè' biuzi'žejè' quienè'. ²⁹Pues žbica inale quie ben' reru'un tzala'la ži'i Diuzi? žBica inale quie ben' rutitu lèbè' inajè': "Bibi zaca' dan' gutinè' lè'è yaga cruzo ulato ren quienè'?" Nedyè'è Bichi Be quie Diuzi yugulu

benè', na'ra žbica inale quie ben' rutasi runio Bichi Be quienè'? žQuele mazara castigo huala gula reya'ala' gaca quiejè'? Pues bira raxejè' tu ta beyue lèjè' yèri lao Diuzi dza na'. Pues nun quie guti Cristo lè'è yaga cruzo ulato ren quienè', lena' nezcaziro nacan tali hue Diuzi quiero cabè' tadya'a unè' huenè' quiero. Pues bira raxejè' tu ta beyuen lèjè' yèri lao Diuzi dza na'. ³⁰Dyè'èdi nezziro Diuzi na' unè' caniga: "Cuenda quia' na' hua' benè' castigo. Huaguizuga'jè' quie tamala bèjè'." Lèscan' una Diuzi: "Nè'èdi' ichugulia' quie yaca ben' nao xneza'." ³¹Nacan ta idzebitzegue ja benè' cati hue Diuzi lèjè' castigo.

³²Pero bigala'adyi'le cabè' guca quiele dza na', dza cati zaozulaole unaole xneza Cristo. Dyè'èdi uzuele bèle gan cabè' tazèdi gula guca quiele bedzagalaotzeguele. ³³Pues dza na' ptasi bnio ja benè' le'e. Psacajè' bala le'e bizinaquezi zaca'lao lao ja ben' yedyi quiele. Lèscan' ibala le'e guca quiele bedzagalaole cabè' bedzagalao laguedyile. ³⁴Dyè'èdi beyèchi'la'adyi'le laguedyile, ben' nao xneza Cristo, ben' de lu'u dyiguiba. Lèscan' hasta uzule gusto uzuele bè' uduba ja benè' ta de quiele, como dan' nezile dera ta de quiele guibá ta nacara huen gula ta biyeyudyi yedu quie. ³⁵Biusanle sudyi'ilèle Diuzi, porque huata' tadya'a gula guibá quie ben' rzudyi'ilè lèbè'. ³⁶Pues le'e bireya'ala' yeyatile huele ca re'en Diuzi huele. Cana' idyin dza hue Diuzi tadya'a quiele cabè' unè' huenè' quiele. ³⁷Lena' rnèn lè'è guichi la'ya quie Diuzi cani:

Iledao'zi idyin dza cati guida
ben' guida, pero bitzenè'
guidanè'.

³⁸ Nu ben' rzudyi'ilè nè'èdi', gata'
yela' neban quienè' tuzioli.
Pero chi usannè' bira inañonè'
xneza', bisua' gusto conlè
lèbè'.

Cana' una Diuzi. ³⁹ Pero ra'lo
binacaro ben' usan, ben' bira inao
xneza Diuzi. Binacaro ben' cuiagui'
tuzioli. Dugalo nacaro ben' rue quie
quie Diuzi. Nacaro ben' sue hue gan
gata' yela' neban quie tuzioli.

Cabè' naca quie ben' rzudyi'ilè Diuzi

11 Cati sudyi'ilèro Diuzi neziro
du guicho du la'adyi'ro
huenè' tadya'a quiero cabè'
rbezaro huenè' quiero. Lèscan' cati
sudyi'ilèro Diuzi nužela'adyi'ro
nacan tali zuè' r nabè'nè' la'acazi
bisaque' ilè'èroguè'. ² Yaca
xuzixta'oro, ben' unita' tiempote,
uzu Diuzi gusto conlè lèjè' nun quie
bè quieyaquè' quienè'.

³ Nun quie dan' rzudyi'ilèro Diuzi
neziro dyin bè Diuzi bzalonè' bènè'
yugulu ta de žan guibá tiempote.
Conlè fuerza valor quie xti'idza'nè',
cana' guta'n. Conlè ta bisaque' ilè'èro,
bènè' bzaloguè' tu ta ilè'èro na'a.

⁴ Nun quie uzudyi'ilè Abel Diuzi,
bè'nè' Diuzi tu gun nacara dya'ara,
quele cabè' naca gun ta bè' bichinè'
Caín Diuzi. Quie lena' blè'è Diuzi
Abel ben' laxta'o yèri, uži'nè' gun
quienè'. Na'ra la'acazi aguti Abel,
nenaquè' tu ejemplo cabè' reya'ala'
huero, reya'ala' sudyi'ilèro Diuzi
cabè' uzudyi'ilè Abel Diuzi.

⁵ Nun quie dan' uzudyi'ilè Enoc
Diuzi, bezi' Diuzi lèbè' zeyoguè'

guibá bigutinè'. Nun quie bezi'
Diuzi lèbè', bira bedzele yaca benè'
lèbè'. Rnèn lè'è guichi la'iya quie
Diuzi de que tu binesi' Diuzi lèbè',
lega yaxe Diuzi lèbè' cabè' bènè'.
⁶ Chi bisudyi'ilèro Diuzi, bisaque'
tzaxe Diuzi ra'lo cabè' ruero, porque
ta tzionla'adyi'ro Diuzi, ruen zi
galero zunè', ruen zi galero huenè'
tahuen quie nu ben' nao xnezè'.

⁷ Nun quie dan' uzudyi'ilè Noé
Diuzi, bzunè' di'idza' ca di'idza'
gudyi Diuzi lèbè', bènè' tu barco
že gula cuenda te ilanè' len yaca
familia quienè' como dan' gudyi
Diuzi lèbè' huaca juicio lao yedyi
layu, huaca juicio ca juicio ta
binelè'èjè'. Nun quie dan' uzudyi'ilè
Noé Diuzi, udixogue'nè' yaca ben'
unita' dza tiempote hue Diuzi lèjè'
castigo. Cana' blè'è Diuzi Noé ben'
laxta'o yèri nun quie uzudyi'ilènè'
Diuzi.

⁸ Nun quie dan' uzudyi'ilè
Abraham Diuzi, bzunè' di'idza'
dza cati gudyi Diuzi lèbè' ta uzè'è
yedyi quienè' zioquè' ga tula ga de
layu hue' Diuzi lèbè' gaque quienè'.
Ba'ala'cazi binenezinè' ga ise'ela'
Diuzi lèbè', pero uzè'è zioquè'.

⁹ Nun quie dan' uzudyi'ilè Abraham
Diuzi, uzunè' ga de layu una Diuzi
hue'nè' quienè', pero uzunè' na' ca
quie binaquen quienè', ca quie ben'
zu yedyi binaca yedyi quie. Puro
lu'u yu'u de la'ari'zi uzunè'. Lèscan'
cabè' bè Abraham, cana' bèrè
ži'inè' Isaac, cana' bèrè ži'isubanè'
Jacob. Lèscan' conlè lèjè' bega'nè'
Diuzi lèjè' di'idza' huadyin dza
hue'nè' lèjè' gaque quiejè' layu ga
zujè'. ¹⁰ Cana' bè Abraham, porque
ulezanè' dza cati yeyoguè' ga zu

Diuzi, ga zu tu yedyi ta biyeyudyi yedu quie, yedyi ta bë cuin Diuzi.

¹¹Lëscan', hasta nigula quienë' Sara, nun quie dan' uzudyi'ilënë' Diuzi, bë' Diuzi lëbë' fuerza gucanë' žna' bdao', la'acazi abgulanë' aode tiempo quienë' ta hua'anë' bdao'. Bzucazi Diuzi di'idza' ca di'idza' bega'nlënë' lëbë', gucalënë' lëbë' ta ila' tu xcuidi' byu quienë'.

¹²Lëscan' Abraham, ba'ala'cazi abgulë' banapë' zë iza, ba'ala'cazi ganu ži'inë' uzu, pero bdyincazi dza golo tu ži'inë', bi' inita' ži'isube zë gula. Quie lena' uzu di'idza' unita' ži'isubanë' tazë gula. Nita'jël' ca quie bélo dya guibá, nita'jël' ca quie yožo re' ru'a yao že, bisaque' ulabaron. Cana' nita' ži'isuba Abraham.

¹³Na'ra lëben' uzudyi'ilë Diuzi agutijël' yugulujël'. Binehue Diuzi quiejël' cabë' unanë' huenë' quiejël', pero como uzudyi'ilëjël' Diuzi, cana' nužela'adyi'jël' idyincazi dza hue Diuzi quiejël' cabë' unanë' huenë' quiejël'. Cana' bedaohuejël' unajël' ca naca pensari quiejël', unezijël' bisujël' lao yedyi layu tuzioli. ¹⁴Quie yaca ben' una cana', rulu'en quiejël' dyë'ëdi rbezajël' yeyojël' sujël' ga naca quiejël'. ¹⁵Pero bibdëbijël' quie layu ga brojël' uza'jël', porque chi dbëbijël' quie layu na', bebi'jël' bedyinjël' ga uza'jël'. ¹⁶Pero gu'unjël' tziojël' tzesujël' ga nacatera dya'a, ta inaro gu'unjël' tziojël' tzesujël' guibá ga zu Diuzi. Quie lena' redaohue Diuzi cati inajël' naquë' Diuzi quiejël'. Pues banuetza'o Diuzi tu ciudad guibá ga sujël'.

¹⁷Nun quie uzudyi'ilë Abraham Diuzi, uquië'në' ži'inë' Isaac ta

gutinë'bi' udyianë'bi' lao ru'aba ca gun quie Diuzi dza cati bë Diuzi lëbë' tu prueba chi tali hue quienë' ca una Diuzi lëbë'. Uzunë' dispuesto ta gutinë' tu litza' ži'inë' Isaac, la'acazi bega'nlë Diuzi lëbë' di'idza' dza na' cati unë' gudyinë' lëbë' cani: ¹⁸“Lao na'a ži'ilo' Isaac huanita' ja ži'isubo.” ¹⁹Na'ra gule Abraham napa Diuzi poder ta yesebannë' ben' huati. Huazaque' inaro guca quie Abraham len ži'inë' como si fuera beseban Diuzi ži'i Abraham caora bezi'në' ži'inë' tatula nebambi'.

²⁰Nun quie dan' uzudyi'ilë Isaac Diuzi, bëla'iya Isaac ži'inë' Jacob len ži'inë' Esaú gudyinë' lëjël' cabë' gaca quiejël' dza zaza'ra. ²¹Lëscan' nun quie dan' uzudyi'ilë Jacob Diuzi, bëla'iya Jacob ja ži'i José dza cati anapë' iza baruen bago gatinë', uyonla'adyi'në' Diuzi pquichinë' xaga quienë' layu ta gucalën lënë' ta zënë'. ²²Nun quie dan' uzudyi'ilë José Diuzi, udixogue'në' ben' Israel idyincazi dza yerojël' sa'jël' nación Egipto, bënë' lëjël' mandado cuiojël' chita quienë' hua'ajë'n dza cati sa'jël'. Cana' udixogue' José lëjël' dza cati baruen bago gatinë'.

²³Nun quie dan' uzudyi'ilë xuzi žna' Moisés Diuzi, pcachi'jël' lëbi' tzona biu' dza cati golobi', como dan' blë'ëjël' naca bdao' na' badan gula. Na'ra bibdzebijël' rey quie ben' Egipto, como dan' bë rey na' mandado gati yugulu bdao' byu quie ben' Israel. ²⁴Nun quie dan' uzudyi'ilë Moisés Diuzi, bigu'unnë' ilë'ë ja benë' lëbë' ca ži'i nigula, ben' naca ži'i rey quie ben' Egipto cati bgulanë' guquë' ben' huaca.

²⁵Quie lena' uzunë' dispuesto ta yedzagalaonë' gacalënë' ben' yedyi quienë' tuže. Uzunë' dispuesto yedzagalaonë', bigu'unnë' inaohuë' neza mala quie ben' Egipto.

²⁶Unezinë' nacaran huenra yedzagalaonë' cabë' bedzagalao Cristo, ta inaro uzunë' dispuesto hue ja benë' lëbë' bizinaquezi cuenda gacalënë' ben' Israel, bigu'unnë' gaca quienë' yela' uña'a ta de quie ben' Egipto. Quie lena' bigulenë' quie ben' Egipto, como dan' unezinë' cabë' tahuenra de ta hue' Diuzi lëbë'. ²⁷Nun quie dan' uzudyi'ilë Moisés Diuzi, bžnononë' nación Egipto, pero bibdzebinë' bdza' rey quie ben' Egipto lëbë'. Uzuenë' como nuebë'në' Diuzi, ben' birzaque' ilë'ëro.

²⁸Nun quie dan' uzudyi'ilë Moisés Diuzi, udixonë' lani pascua bënë' mandado bzio ben' Israel ren quie beco' ži'ila' ru'a yu'u quie žan yu'u quie quiejë', como dan' use'ela' Diuzi tu ángel ta gutinë' xcuidi' byu nëro quie nu ben' bibzio ren ru'a yu'u quie. ²⁹Nun quie dan' uzudyi'ilë ben' Israel Diuzi dza na', udejë' ga de nisadao' laona Nisadao' Žna dza na'te. Uyalo tu neza ga udejë' lu'u nisa beyacan layu bidyi. Na'ra cati gu'un ja benë' Egipto terëjë' cabë' ude ben' Israel, bedaco' nisa lëjë' gutijë'.

³⁰Nun quie dan' uzudyi'ilë ben' Israel Diuzi dza na', byala ja besu ta naca sibi ta neyëcho ru'a ciudad Jericó caora cati beyudyi uyëchojë' ru'a lao ciudad lao gadyi dza cabë' mandado bë Diuzi huejë'. ³¹Lëscan' tu nigula bëti' gusto quie, ben' lao Rahab, nun quie dan' uzudyi'ilënë'

Diuzi, bigutinë' dza na' caora cati bdyiagui' ben' Israel ben' yedyi quienë', ben' bigu'un hue quie cabë' una Diuzi. Biguti nigula na' nun quie gucalënë' chopa ben' Israel, ben' uyo balarazi ta yena'ljë' ca naca ciudad Jericó.

³²¿Ca bižira ta inia' le'e? Bide tiempo ta inia' le'e quie Gedeón, quie Barac, quie Sansón, quie Jefté, quie rey David, quie Samuel, quie yaca profeta, ben' udixogue' xti'idza' Diuzi tiempote. ³³Nun quie dan' uzudyi'ilëjë' Diuzi, bëjë' gan bëtijë' yaca enemigo quiejë' cati udilalëjë' lëjë', bëjë' gan unabëljë' lao ja yedyi quiejë', bëjë' gan gucalë Diuzi lëjë' cabë' una Diuzi huenë' quiejë', bëjë' gan bibi guca quiejë' cati gu'un yaca león qui'imba' lëjë', ³⁴bëjë' gan besulajë' gui' ta raca gui' bela, bëjë' gan ulajë' lao na'a ben' re'en guti lëjë' conlë espada. Lëscan' yaca ben' bdzebi dza na', bibedzebijë' cati gucadilalëjë' ja soldado quie ben' yedyi tula. ³⁵Lëscan' guca quie bala nigula unita' dza na' bezi'ljë' ben' huati quiejë' tatula nebanjë'.

Pero unita' ja ben' tula guticazijë'. Udi benë' lëjë' hasta gutijë', pero bipsanjë' unaojë' xneza Diuzi cabë' gu'un ben' udi lëjë'. Cana' gutijë', pero unezijë' huadyin dza useban Diuzi lëjë' sujë' guibá ga nacaran huen gula. ³⁶Na'ra balajë' ptitu ja benë' lëjë'. Ibalajë' udi ja benë' lëjë' guidi. Ibalajë' pquio ja benë' lëjë' caden, bdze'ljë' lëjë' lu'u dyiguiba. ³⁷Ibalajë' bëti ja benë' lëjë' con yo. Ibalajë' uchugu ja benë' lëjë' conlë serucho gucajë' chopa yo'o. Ibalajë' bëjë' lëjë' bizinaquezi cuenda usanjë' bira inaojë' xneza

Diuzi, na' bëtijè' lèjè' con espada. Ibalajè' udajè' ni'nizi, gucojè' žaba beco' ži'ila', gucojè' žaba chibo. Bibi guta' quiejè', guca zèdi gula quiejè'. Psaca benè' lèjè' bizinaquezi.

³⁸Bibizaca' ja ben' nita' lao yedyi ta inita'lèjè' lèjè' tuže. Cana' guca quiejè' udajè' ni'nizi ga naca lato dachi, udajè' ni'nizi lao ya'a, udajè' ni'nizi ga zu beló. ³⁹Na'ra lèjè', ba'ala'cazi uzudyi'ilèjè' Diuzi, lèscan' ba'ala'cazi uzu Diuzi gusto cabè' bèjè' dza na', biuži'ljè' quiejè' yugulu cabè' tadya'a unè Diuzi hue'nè' quiejè'. ⁴⁰Nerdziogue hue Diuzi tadya'a quiejè', porque unanè' huenè' tadya'a quiejè' tuže len ra'o, ben' laxta'o yèri, ben' la'ia, ben' bide dula' xquia quie. Lena' nacaran huen hue Diuzi tadya'a quiero tuže len lèjè' guibá ga zuè'.

**Reya'ala' inaoro xneza Cristo
du guicho du la'adyi'ro**

12 Quie lena' como nita' ben' zè gula, ben' bablu'e ra'o cabè' uzudyi'ilèjè' Diuzi dza na', reya'ala' usanla'adyi'ro yugu ta rudzun ra'o inaoro xneza Cristo. Lèscan' reya'ala' usanla'adyi'ro bira huero tamala cabè' nequionan ra'o bire'ennan huero tahuen. Reya'ala' inaoro xneza Cristo du guicho du la'adyi'ro, biyeyatiro huero ca udxu Diuzi quiero huero. ²Reya'ala' huero cuenda cabè' re'en Jesús huero. Naca Jesús ben' naca ejemplo belaotera quiero cabè' reya'ala'huero sudyi'ilèro Diuzi. Ganura zu ben' uzudyi'ilè Diuzi ca lèbè'. Bibdèbinè' nacan yela' stu' quie ben' gati lè'è yaga cruzo. Uzuè' dpuesto bedzagalaonè' gutinè'

lè'è yaga cruzo, como dan' nezinè' caora cati beyudyi bedzagalaonè', huapala'n Diuzi lèbè' tzeque'nè' zaquè' yebè ga re' Diuzi guibá.

³Reya'ala' huele pensari cabè' bè Jesús uzuenè' cabè' tamala psacayudyi ben' mala lèbè'. Lena' gacalèn le'e ta biyehuèdile biyeyatile inaole xnezè'. ⁴Pues le'e, nica guti ja benè' le'e nun quie rnaole xneza Cristo. Nica guti ja benè' le'e nun quie bira re'enle huele tamala cabè' lèjè'. ⁵¿Quele agula'adyi'le cabè' rnèyue Diuzi le'e nacale ca ži'inè'? Lena' rnèn lè'è guichi la'ia quie Diuzi caniga:

Ži'ina', bihuele pensari chi bibi zaca'n caora cati rdila Diuzi luè'.

Biyeyatile caora cati hue Diuzi luè' castigo.

⁶Porque rdila Diuzi nu ben' nedyè'lènè', rdila Diuzi yugu ben' naca ži'inè', huenè' lèjè' castigo cati biralèjè' quienè'.

Cana' una Diuzi dza na'. ⁷Na'ra rnia' le'e biidza'le bè' rue Diuzi le'e castigo cati biralele quienè', como dan' ca ži'inè' ruelènè' le'e. ¿Binezile bizu xcuidi' birue xuzibi' lèbi' castigo cati biralebi' quienè'? ⁸Pero chi birdila Diuzi le'e cabè' rdila Diuzi yugu ben' naca ži'inè', lena' ulu'en nacale ca quie xcuidi' tu yo, binezibi' nu naca xuzibi'. ⁹Cati nenacaró xcuidi', caora na' udila xuziro ra'o gulero quienè' udaparonè' bala'ana. Quie lena', ¿quele rna'bè'ran quiero galero cabè' na Xuziro Diuzi zu guibá cuenda gata' yela' neban quiero tuzioli? ¹⁰Cati bigulero quie xuziro dza na', udilanè' ra'o según ca guquenè'

nacan huen quiero, pero tuzi dza nenacaro xcuidi' udilanë' ra'o. Pero Diuzi rdilanë' ra'o cati biralero quienë' yugu dza rdaro lao yedyi layu cuenda tali gaca huen quiero, gacaro ben' la'iya ca naquë' ben' la'iya. ¹¹Tali na' bisuro gusto cati racaro castigo, raquero zi' ca nacan. Pero ude beyudyi gucaro castigo, chi tali aoyoñe'ero, bira huero cabë' tamala bëro. Lena' gacalën ra'o huero puro ta yu'u ni'a xnezi suro gusto.

**Nacan žudyi chu'unro tzalala
cabë' rna Diuzi ra'o**

¹²Quie lena' biyehuëdile huele fuerza ni'a na'ale. ¹³Huele lucha ta unaole neza li quie Cristo. Cana' yezi' fuerza ni'a na'ale tale dyë'ëdi.

¹⁴Huele bala ta sulële yugulu benë' dyë'ëdi. Lëscan' huele bala ta gacale ben' rue quie quie Diuzi, como dan' chi bihue quie quie Diuzi, bisaque' ilë'ële Cristo tzesulënenë' tuže. ¹⁵Gapale cuidado cuenda ni tule bigaca quiele bihuela'iya Diuzi le'te nun quie binaole xnezë' du guicho du la'adyi'le. Lëscan' gapale cuidado bihuele lato su nu ben' bire'en usan dula' xquia quie ladole, porque huenë' quiele ca rue tu guixi' naca veneno, udyiagui'në' yaca los demás ben' nao xneza Cristo. ¹⁶Lëscan' ni tu le'e, bireya'ala' gasilële nigula binaca nigula quiele. Lëscan' bireya'ala' utitole huele pensari bibi zaca' ta naca la'iya quie Diuzi. Cana' bë Esaú tiempote guquenë' bibizaca' ca naca derecho quienë' naquë' bi' nëro. Pues ta udaonë' tu lasazi caora bdzioguenë' ta

gaohuë', bë'në' derecho quienë' bi' bichinë'. ¹⁷Dyë'ëdi nezile cabë' guca quie Esaú dza na'. Cati unabanë' huela'iya xuzinë' lëbë', bira gu'un xuzinë' huela'iyane' lëbë'. Pues la'acazi guquenë' bayëchi' uredyitzeguenë', bira uzaque' huela'iya xuzinë' lëbë'. Bira ubinnë' bi huenë' ta huela'iya xuzinë' lëbë'.

¹⁸Na'ra bihuele cabë' bë xuzixta'oro ben' Israel dza na'. Lëjë' ubiga'ljë' ga'ala' ga zu tu ya'a ga bireya'ala' uliojë'. Lë'ë ya'a na' lega uya'ala'n gui', guca chula, uda tu be bedun' fuerte. ¹⁹Lëjë' bejë' bgüedyi trompeta, bejë' rchi' Diuzi cati unë' bë'lënë' lëjë' di'idza'. Lëben' na' unabayëchi'ljë' Diuzi ta bira hue'lë Diuzi lëjë' di'idza'. ²⁰Cana' gudyijë' Diuzi, como dan' tantozi bdzebijë' yejë' cati una Diuzi gudyinë' lëjë' cani: "Chi bablio tu benë' lë'ë ya'a ni, ulegutinë' conlë yo o conlë lanza, la'achi benë', la'achi bia guixi'." ²¹Tantozi bdzebijë' cabë' blë'ëjë' dza na', hasta cuin Moisés unë' rëbinë' lëjë': "Lega rżizida' rdzeba'."

²²Pero quie le'e, anacan cuenda quiele tzirole lë'ë ya'a laona ya'a Sión ga de ciudad quie Diuzi, ben' zu tuzioli. Anacan cuenda quiele tzirole ciudad Jerusalén zu guibá ga nita' zë mila ángel, ben' negu'udi' ta tzionla'adyi'ljë' Diuzi. ²³Anacan cuenda quiele tzirole ga regu'udi' yaca ben' naca ži'i Diuzi, ben' zu laohue lao lista quie Diuzi. Anacan cuenda quiele tzirole ga zu Diuzi, ben' naca jueza quie yuguluro. Anacan cuenda quiele tzirole ga regu'udi' yaca ben' huen, ben' laxta'o yëri. ²⁴Anacan cuenda

quiele tzirole ga zu Jesús, ben' zëlë ra'o lao Diuzi rutenë' di'idza' ca di'idza' bega'ntza'olë Diuzi ra'o tacubi. Lëscan' naca cuenda quiele yeyëri le lao Diuzi nun quie ulato ren quie Jesús. Quie lena' gacaran huen quiele ulato ren quie Jesús, cala ca ren quie Abel.

²⁵Quie lena' reya'ala' gapale cuidado bichu'unle tzala'la ca na Diuzi, ben' ru'elë le'e di'idza'. Pues biula yaca ben' unita' tiempote, ben' uru'un tzala'la ca una Diuzi dza cati beyëzinë' lao yedyi layu bël'lënë' lëjë' di'idza'. Lëscan' ra'o, biilaro hue Diuzi ra'o castigo chi chu'unro tzala'la ca rnanë' ru'elënë' ra'o di'idza' desde guibá. ²⁶Dyin quie rchi' Diuzi psisi lao yedyi layu dza na', dza cati bël'lë Diuzi Moisés di'idza' lë'ë ya'a Sinaí. Pero cani rna Diuzi na'a: "Itu lasazi usisia' lao yedyi layu, pero quele tuzi yedyi layuzi, lëscan' usisiria' lente guibá." ²⁷Caora una Diuzi "itu lasazi", lena' reya'ala' tzioñe'ero hueyudyi huedu quie ta usisinë'n, pero biyeyudyi yedu quie ta bisaque' usisi yaca benë'. ²⁸Quie lena' reya'ala' yëbiro Diuzi diuxcalelo', como dan' bënnë' lato quiero tzioro ga zuë' rnabë'në', pero biisin biyeyudyi yedu ga rnabë'në'. Reya'ala' tzionla'adyi'ro Diuzi du guicho du la'adyi'ro cabë' re'ennë' huero quienë'. ²⁹Naca Diuzi quiero ca quie tu gui' že ta tzei ben' reru'un lëbë' tzala'la.

Cani re'en Diuzi hue yaca ben' nao xneza Jesús

13 Biusanle idyë'ële ben' bichile, ben' nao xneza Jesús. ²Lëscan' bigala'adyi'le cabë'

reya'ala' huele sule dispuesto gapachi'le dyë'ëdi nu ben' za' žan yu'u quiele, como dan' nu ben' rue cana', hasta ben' naca ángel baoži'jë' žan yu'u quiejë', nica bezaquejë' chi ben' naca ángel na'.

³Lëscan' reya'ala' yeyëchi'la'adyi'le nu ben' naca preso yu'u lu'u dyiguiba. Reya'ala' yeyëchi'la'adyi'lejë' ca quie le'e cuinle yu'ulële lëjë' tuže lu'u dyiguiba. Reya'ala' yeyëchi'la'adyi'le nu ben' raca zëdi quie, rusaca ja benë' lëjë' bizinaquezi. Reya'ala' yeyëchi'la'adyi'lejë' ca quie le'e cuinle raca zëdi quiele, rusaca ja benë' le'e bizinaquezi.

⁴Yugulule reya'ala' huelële laguedyile puro tahuen. La'acazi bazulële laguedyile, la'acazi binesulële laguedyile, bihuele ta naca yela' stu' quiele, porque hue Diuzi castigo nu ben' cuidi', chi rasilëbi' laguedyibi' binesi'bi' lëbi'. Lëscan' hue Diuzi castigo nu ben' bazulë laguedyi, chi rasilënë' ben' tula.

⁵Bisa'la'adyi'le dumi, pero sule contento conlë bi ta de quiele, porque cani rna Diuzi: "Con bitezi gaca quiele, biusanla'adyi'caza' le'e." ⁶Quie lena' huazaque' inaro nužela'adyi'ro nacan tali:

Naca Diuzi ben' racalë ra'o,
biidzebiro chi bi re'en ja benë'
huejë'ra'o.

Cana' rnën lë'ë guichi la'iya quie Diuzi. ⁷Bigala'adyi'le quie ben' napa dyin entre le'e, ben' uidxogue' le'e xti'idza' Diuzi dza na'. Huele pensari cabë' bëjë' gulejë' quie Diuzi, cana' inaole huele cabë' bëjë'.

⁸Tuzi ca naca Jesucristo, biyetza'nè'. Cabè' nacacazè' tiempote, cana' naquè' na'a, cana' nacacazè' tuzioli. ⁹Gapale cuidado bigalele quie ben' re'en inaole cabè' rnajè', rnajè' ta binacan tuzi ca na Cristo. Taže netza'n cabè' rnajè', rnajè' di'idza' zè. Mejorla inabaro Diuzi ta gacalènè' ra'o gunnè' fuerza valor quiero inaooro xneza Cristo. Pero chi gaoro bi cosa, o chi bigaoro bi cosa, lena' bigacalèn ra'o inaooro xneza Cristo. Pues hasta yaca ben' unao dyè'èdi ca naca quie yela' huao dza na', bigucalèn lèjè' ta inaojè' quie Diuzi.

¹⁰Pues netza' ca naca quiero ben' nao xneza Cristo. Guti Cristo lè'è yaga cruzo guquè' gun quie Diuzi. Pero quie yaca ben' nenaò cabè' bè yaca pxuzi quie xuzixta'oro lu'u idao' de la'ari' tiempote, chi nenaòjè' ruejè' cabè' bè ja ben' na', na'ra bisaque' inaorèjè' xneza Cristo. ¹¹Pues tiempote bzio pxuzi rnaòbè'ra quie xuzixta'oro ren quie bia guixi' lu'u idao' de la'ari' ga naca la'iyatzegue. Bzionè'n como ca gun quie Diuzi cuenda yeduba Diuzi dula' xquia quie ja ben' Israel. Pero quie yaca bia guixi', bia bètijè', tzala'la ru'a yedyi bzejijè' cuerpo quieyacaba'. ¹²Lèscan', Cristo, tzala'la ru'a ciudad Jerusalén bedzagalaonè' gutinè' lè'è yaga cruzo cuenda yežinè' dula' xquia quie ben' nao xnezè'. Cana' guca quienè' ulato ren quienè' dza na'. ¹³Quie lena' tziuro inaooro huero quie Cristo, la'acazi yedzagalaoro usaca benè' ra'o bizinaquezi cabè' guca quie Cristo dza na'. ¹⁴Pues bizu yedyi quiero lao yedyi layu

niga ta biyeyudyi yedu quie. Pero rbezaro dza zaza'ra tziuro tu yedyi zu guibá. ¹⁵Quie lena' reya'ala' tzionla'adyi'ro Diuzi lao na'a Jesucristo tuzioli. Lena' cati tzionla'adyi'ronè' nacan gun quienè' ta hue'ronè', ta inaro, ulidzaronè' hueronè' ben' že. ¹⁶Bigala'adyi'le huele tahuen. Bigala'adyi'le gacalèle ben' rdziogue quie con ta de quiele, porque cana' re'en Diuzi huele, cana' naca gun quie Diuzi reya'ala' hue'lenè'.

¹⁷Lèscan' galele uzule di'idza' quie ben' napa dyin quiele, ben' rue dyin quie Diuzi. Naca cuenda quiejè' gapajè' le'le dyè'èdi, gacalèjè' le'le inaole xneza Cristo. Neziyè' huadyin dza yedejè' cuenda lao Diuzi cabè' bèjè' udapajè' le'e. Huele dyabè' ta sujè' gusto cabè' naca dyin napajè'. Bihuele quiejè' ta bisujè' gusto, como dan' chi huele cana', bihuena huen quiele.

¹⁸Ulidzale Diuzi ta gacalènè' nètò'. Pues nužela'adyi'ndo' puro pensari huen yu'undo', puro tahuen re'enndo' huendo' con bitezi ta huendo'. ¹⁹Huele orar por nè'èdi' cuenda gacalè Diuzi nè'èdi' laguidatia' ideyuba' le'le tatula.

Blidzanè' Diuzi ta gacalènè' lèjè'

²⁰⁻²¹Rulidza' Diuzi, ben' cuèchi chizi laxta'oro, ta gacalènè' le'le dyè'èdi ta huele ca re'en Diuzi huele. Naca Diuzi ben' pseban Señor quiero Jesucristo, ben' rapa ra'o ca quie ben' rapa beco' ži'ila', ulato ren quienè' lè'è yaga cruzo cuenda gaca seguro para tuzioli cabè' di'idza' bega'ntza'olè' Diuzi yaca benèchi'. Lèscana' rulidza'

Diuzi ta gacalënë' yuguluro ta galero quienë' du guicho du la'adyi'ro, huero puro ca re'ennë' huero nun quie dan' nacaro ben' quie Jesucristo. ¡Huero Cristo ben' že tuzioli! Amén.

²²Bicha', rnaba' cule laole ta uzënegale dyë'ëdi cabë' naca di'idza' unia' le'e niga runa' le'e consejo. Pues quele di'idza' zë bzua' lë'ë guichi pse'ela'n laole.

²³Lëscana' rguixogui'a le'e

abero ben' bichiro Timoteo lu'u dyiguiba. Na'ra chi abela'nezanë', na' huaqui'anë' guidando' ta ideyubindo' le'e.

²⁴Lëscana' gapale diuži ben' napa dyin quiele, ben' rue dyin quie Diuzi. Lëscan' gapale diuži yugulu ben' bichiro, ben' nao xneza Cristo ga zule. Rgapa ben' yedyi Italia le'e diuži.

²⁵Rulidza' Diuzi huela'iyänë' le'e yugulule. Amén.